

Milton D. Gomez

Nos Gobernador merece un estatua!

Cada miembro di nos comunidad y di nos futuro generacionnan cu ta consciente di e actual situacion hopi precario di nos pais y cu realmente ta stima e pida baranca aki den tur su existencialismo ahenos na cualkier sentimiento politico/partidista, mester ta orguyoso y agradecido na nos grandinan di antaño, en particular na e politicianan, lider o no lider y e legisladonan di e epoca correspondiente.

Nan tabatin amor pa patria, hopi sabiduria y vision. Den nan buskeda y lucha separadamente pero uni pa logra nos Status Aparte y mas autonomia, parti integral y substancial di nan tarea cumpli cabalmente y cu hopi bes den bida diario nos ta ignora of menosprecia tabata pa retransmiti y convence Hulanda cu e deseo semper ferviente di nos pueblo ta pa keda den reino y mantene laso estatal directo cu Hulanda cu E miembro maximo di Casa Real na cabes di nos gobernacion o sea di nos pueblo den persona di un Gobernador.

Den e contexto aki ta bon pa recorda y pa un y tur comprende cu den pasado varios prominente politico Hulandes y hopi recien e prome ministro Hulandes Sr. Mark Rutte a base di e conflicto serio cu a surgi pa motibo cu e prome ministro no kier respetar palabracionnan mutuamente haci, den forma di menasa atrobe a ofrece pa manda pa nos e independencia via post of e-mail.

Si acaso, ta esaki nos ta desea! Un mensahe bon cla y cu ta papia pa su mes! Nos politicianan di antaño a logra mucho mas tambe! A pesar di e hecho cu nos autonomia cu un grupo tabata yama tambe "baas den nos mes cas" practicamente tabata garantisa

caba, nan a urgi o sea a bay di acuerdo cu Hulanda ta mantene un tipo di "supervision" riba cierto tarea y area di nos gobernacion. Esaki pa proteha nos pueblo y cada uno di nos contra un posibel decision of manejo menos bon den futuro cu lo por ta perjudicial pa nos pueblo!

Finalmente den e Statuut vigente (art. 43 punto 2) e area y e tarea limita aki a wordo estableci como lo siguiente: "e derechonan y libertad fundamental y e seguridad huridico y e bon calidad di gobernacion". Cu otro palabra: Si gobierno no cumpli debidamente Hulanda ta y lo percura pa pone nos gobierno respetar cada un di e derechonan y libertad menciona, di cada uno di nos como ciudadano.

E amor pa patria, e hopi sabiduria y e vision di nos politicianan di antaño cu a conduci na e "supervision" aki no a resulta inutil y no tabata en vano! Aña 2014 nan a duna fruta y a muestra nan balor!

Nan a scapa Aruba di un colapso financiero total cu tur su consecuencia pa cada uno di nos riba e pida baranca aki. Tin expertonan cu ya caba ta papia di un "bancarota tecnico" di nos digno pueblo!

Particularmente interesante y oportuno pa menciona ta cu nos actual Gobernador sr. Fredis Refunjol den pasado como un politico destaca tambe tabata forma parti di e grupo di politicianan di antaño na cual mi ta referi. Despues di 60 aña di e Statuut y 28 aña di nos Status Aparte pa prome bes den e historia politico di reino y Aruba no obstante varios esfuerço, recordatorio y advertencia Hulanda pa evita un bancarota di nos pueblo y pa proteha e imagen di reino a husga cu ta oportuno y necesario pa medio di un "aanwijzing" y un "K.B." aplica e "supervision"

y interveni den e asuntonan financiero di nos pais pa falta di bon gobernacion cu a ser constata e ultimo 5 aña di e gobernacion actual.

E meta ta pa di biaha pone un fin tras di e menasa di bancarota y evita cu gobiernu di Aruba ta sigui gasta placa sin misericordia y sin tene cuenta cu e bienestar di nos pueblo. Ironia di tur esaki ta cu e mes nieto y yiu di e autornan intelectual di e lema "baas den nos mes cas" a causa e aplicacion di e "supervision" y e intervencion den nos autonomia. Esaki ta significa cu e mesun persona aki cu tabata acusa otronan di entreguista, aña 2014 a resulta di ta e entreguista.

Otro ironia ta tambe cu ta e mesun politico di antaño cu mi a menciona mas biaha caba, esta sr. Fredis Refunjol awor den calidad di Gobernador ta e figura responsable, clave y instrumental pa ehecuta e "supervision" cu e mes como politico a recomendar of sostene den pasado. Esaki ta significa tambe cu un di esunnan cu den pasado a ser acusa di ta entreguista ta esun cu ta bay supervisa loke e prome ministro a entrega. "Pisca ta muri pa su boca!"

E "aanwijzing" cu Gobernador a ricibi ta pa no firma e presupuesto 2014 pa falta di cumplimiento cu palabracionnan haci. Ademas fuera di e hecho cu e presupuesto contra tur regla legal a ser entrega 10 luna laat, e presupuesto ainda tabata incompleto, ficticio y irrealistico mescos cu e 4 aña anterior. Cu otro palabra un presupuesto mancaron y falso cu e evidente unico meta pa brindar e posibilidad y facilidad legal pa nos gobernantenan por sigui fia y gasta placa di pueblo sin tene cuenta cu e consecuencianan pa e derechonan y e necesidnan pri-

mario di nos pueblo.

Considerando e echo cu no por wordo nenga cu ta e propio prome ministro ta e culpabel y e causante mayor di e aanwijzing humanamente y politicamente por a spera un actitud mas respetuoso y pacifica pa trata ainda suspende of elimina e aanwijzing y posibel otro medidanan. "Grandeza di un persona ta ora cu e ta reconoce su erornan"! E prome ministro sinembargo a scoge pa un guerra di trinchera o sea un guerra cayehera publicitario den forma di un pseudo welga di hamber den un pseudo bunker dilanti di e oficina di e Gobernador y contra e Gobernador personalmente. Ciertu medianan di publicidad y periodistanan hunto cu otronan tabata encarga pa manda e misilnan den forma di tur sorto di ofensanan baho y sushi y hasta menasanan. Su familiar no a scapa!

Tur esaki acompaña cu cuminda, bebida y musica. Un pantomina publicitario total pa caricia e vanidad di e prome ministro mescos cu e Consejo Consultativo a haci recientemente. E meta di e guerra aki tabata pa forsa e Gobernador cueste lo que cueste pa firma e presupuesto. Ta bon pa añadi aki cu ta immoral forsa cualkier hende firma cualkier documento siendo ta bon conoci cu e documento ta falso!

E consecuencia di tur e pantomina aki ta cu no a tarda mucho cu e K.B. a yega cu mas instruccion ainda pa e Gobernador, entre otro e presencia di e Comision di Supervision di Hulanda o sea e CFT. Contra esaki tambe prome ministro y consorcio a protesta fuertemente y hasta a nenga di coopera, pero despues tur mester a baha cabes te na suela, mescos cu nos prome ministro ultima-

mente a haci respetando tur pero delaster uno di e condicionnan y instruccionnan cu Hulanda a impone. Asina tambe reconfirma cu nos Gobernador tabatin tur motibo y rason pa no firma e presupuesto 2014!

Ta bon pa e prome ministro realisa pa un bes y pa semper cu e logro di nos Status Aparte no ta un punto final. E ta un instrumento cu tin como meta e reto pa nos gobernantenan persigui y logra e maximo di paz, tranquilidad, harmonia y felicidad pa nos pueblo y no pa nos conduci Aruba na bancarota. Como hende e actitud inhumano y despreciable di e prome ministro cu su gang emocionalmente lo a afecta nos Gobernador y su famia. "No haci cu otro loke bo no ta desea pa otro haci cu bo!"

Sinembargo manera semper, trankil, honesto, humilde y responsabel nos Gobernador Sr. Refunjol, firme y solido manera e Sero di Alejandro cu determinacion a cumpli cu su deber moral y constitucional y no a firma e presupuesto 2014, un presupuesto incompleto, ficticio y irrealistico. Cu otro palabra un presupuesto mancaron falso y ilegal. Nos Gobernador NO ta para su so! Prueba ta e lista di mas di 10.000 firmante cu a subraya nan solidaridad cu nos Gobernador. Ademas dia 26 proximo ta organisa un manifestacion masal pa un bes mas muestra nan solidaridad cu nos Gobernador.

Nos Gobernador sr. Fredis Refunjol, un palo di homber! E merece un estatua poni den centro o sea den e curason di nos isla como simbolo pa nos yiunan y futuro generacionnan di e Arubiano humilde y balente cu aña 2014 a scapa nos dushi pida baranca cu yama Aruba di un bancarota total! □